

1. Այս կարճ կյանքի մեջ ինձ
 համոզեցիր,
 Որ Սեր ես անհուն, օրհնյալ
 Քրիստոս,
 Եվ Քո կամքով էր, որ ինձ
 ընտրեցիր
 Որպես Քեզ եղբայր, լուսե
 Քրիստոս:
 Բարձրյալի Որդի, ինձ
 համոզեցիր,
 Որ միայն Դու ես իմ Բարեկամը,
 Առաջին օրից քիմքիս թողեցիր
 Քաղցր խոսքերիդ մեղրաբույր
 համը:

2. Աստծո Որդի, ինձ համոզեցիր,
 Որ միայն Դու ես տերերի Տերը,
 Խավար սրտիս մեջ լույսդ
 վառեցիր
 Ու ինձ ասացիր՝ հենց ես եմ
 Սերը:
 Իմ խաչյալ Հիսոս, ինձ
 համոզեցիր
 Անցնող աշխարհի
 ունայնությունը,
 Մեղքերս առար, խաչիդ
 գամեցիր՝
 Քեզ հետ բերելով մեծ
 հաղթությունը:

3. Հարուցյալ Հիսոս, ինձ

համոզեցիր,
 Որ միայն Դու ես ճամփան ու
 կյանքը,
 Հոգովդ իմ մեջ նոր սիրտ
 դրեցիր՝
 Դարձնելով ինձ Աստծո
 ժառանգը:
 Ո՛վ իմ Սուրբ Հիսոս, ինձ
 համոզեցիր,
 Որ Դու ես, Դու ես հացը
 երկնային,
 Հոգովդ հոգուս աչքը բացեցիր,
 Որ տեսնի փառքը Քո
 աստվածային:

4. Թանկագին իմ Տէր, ինձ
 համոզեցիր,
 Որ ես առանց Քեզ ապրել չեմ
 կարող,
 Քեզանով վառվող այսօրվա
 լույսս
 Առանց Քեզ մի խեղճ ճրագ է
 մարող:
 Հիմա էլ կրկին ինձ համոզում ես,
 Որ Դու իմ Հայրն ես ու
 Պահապանս,
 Միշտ համոզում ես ու միշտ
 ուզում ես,
 Որ մնամ Քո մեջ, իմ սուրբ
 Տապանս: